

Hebreos, mé carta cuahan nuú na Israel

Nachindahá Ndióxi Jesucristo ña ná quixi a jáyaha tuhun Ndióxi nu yo

¹ Cuahá ndivaha tañu nacahan Ndióxi sanahá xihín tásáñnu jíco yo. Ta cuahá ndivaha nuú nacahan xihín ná tá najáyaha na profeta tuhun cáhan mé á nuú ñayivi. ² Joo tiempo nu ndíhí yóho nachindahá mé á Jesucristo, in túhún jiní já jahyi a ña ná jáyaha tuhun Ndióxi nu yo viti. Ta nacaja Ndióxi ña nacavaha Jesucristo ndijáá ñaha ñuyívi xihín ñaha indiví. Ta najándacoo Ndióxi tóco ndihi ñaha yóho ndáha mé á. ³ Ta mé á quéa náha ndá quiahva cáhnu cúu Ndióxi jáchi yéhe a tá quiahva yéhe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuénta saha tóco ndihi ñaha jáchi iin ndivaha ndée tuhun mé á. Ta nandaja vií mé a mí nuú ndihi cuachí ta já nasacoo a indiví xoo cuáha Ndióxi, tátá a.

Cáhnu chága Jesucristo a juú ga tátó Ndióxi

⁴ Ta Jesucristo, mé jahyi Ndióxi naxinu a nanduu a ña cáhnu chága a juú ga tátó Ndióxi. Ta nacaja Ndióxi ña ná ñehe táhvi á ña cáhnu chága quivi naní a a juú ga quivi tátó mé á. ⁵ Jáchi a ñaha cachi Ndióxi xihín ni in túhún toho tátó mé á tá quiahva nacachi a xihín jahyi a já:
Jahyi yéhe cúu yóhó,
ta viti cáhí i ña nanduu u tátún, cáhí a.

Ta ni coó ñacachi Ndióxi xihín ni in túhún toho tátó á tá quiahva ñacachi a xihín jahyi a já:

Yehe cacuu u tátún,

ta yóhó cacuún in túhún jini já jahyi yehe, cáhí a.

⁶ Joo tá jalóho cúni chindahá Ndióxi Jesucristo, jahyi a ñuyívi yóho já ñacachi a já:

Ndítahan nu tóco ndihi tátó mí i caja cáhnu na jahyi i, ñacachi a.

⁷ Já ñacachi Ndióxi já saha tátó mé á:

Tá quiahva cama chá xícó tachí quiahva já cama chá cuahan tátó mí i.

Ta yehe na tá quiahva yehe ñuhú cáyi ita, já ñacachi Ndióxi.

⁸ Joo tá ñacahan Ndióxi sahá jahyi a já ñacachi a já:

Yóhó cúun Ndióxi ta cacomún cuéntá sahá ñayivi anda ama cáa quivi,

ta cáhndún chuun xihín ña ndaa.

⁹ Ta a juú quiahva cátóun ña vaha ta ñacandajún ña núu.

Sahá ña cán quéa ñacaxi i yohó jáchi yehe cúu u Ndióxi ta cúu u tátún.

Ta najácutú ndaa i yohó xihín ña cájii inún já ná caji chága inún a juú ga na xica xuhun, ñacachi a.

¹⁰ Ta jári já ñacachi a já xihín jahyi a:

Ñacavahun tóco ndihi ñaha tá ñacava sahá saha ñuyívi ta cúun xitoho nuú ña cán.

Ta xihín ndahun ñacavahun indiví.

¹¹ Ta vaxi quivi tá ndihi saha tóco ndihi ña yóho joo mún coo tá coún anda ama cáa quivi.

Ta tóco ndihi ña jan cayatá ña tá quiahva cayatá jáhma ndíxi na.

12 Tá quiahva sáhnü ñayivi jáhma quiahva já chichahnún ñuyíví xihín indiví.

Ta tá quiahva ndíjama ñayivi jáhma ndíxi na quiahva já ndijama ña jan cajún.

Joo mún a ndíjama tohún jáchi coo tá coún anda ama cáa quívi,

ta a ndíjama tohún ta a ndíhi toho sahún, nacachi Ndióxi xihín Jesucristo.

13 A ñáha cachí Ndióxi xihín ni in túhún toho tátó mé á tá quiahva nacachí a xihín jahyi a já:

Naha quí cacoún xoo cuáha i yóho,

janda quiahva ná cahnu i nu tóco ndihi na co cúní yohó ta janda ná chinduu u na sahún jan, nacachi Ndióxi xihín Jesucristo.

14 Jáchi tóco ndihi tátó Ndióxi cúú ná na tácu ta ín ínima ná joo coó toho yiquí cuñu na. Cája chúun na cuéntá Ndióxi ta mé á chíndahá a na ñuyíví ña ná chindeé na ñayivi, na nacaxi Ndióxi cacu ndaa ínima.

2

Naquixi Jesucristo jácacu a mí

¹ Sahá ña cán quéa ndítahan nu yó taa johó í ña ndaa, ña naxini johó í já ná a cáxoo í íchi cuéntá Ndióxi. ² Nacahan tátó Ndióxi tuhun nasahan mé á nu ná ta cúú á ña ndaa joo coó naxeen ñayivi cacu vaha na ña. Sahá ña cán quéa najándoho Ndióxi ini na tá quiahva ndítahan ndoho ini na sahá cuachi nacaja na. ³ Joo mí, ndaja caja í cacu ndaa ínima yo tá ta co taa johó í tuhun cahan sahá Jesús, mé a jácacu mí. Ta ña yóho cúú á ña cáhnu ndivaha jáchi jihna ñúhú ga mé Jesucristo, xitoho í nacaxi

tuhun a ña yóho nuú ñayivi. Ta na nataa johu nu cáhan mé á, na cán sahan na tuhun na nu yo ña cúú á ña ndaa. ⁴ Ta náha Ndióxi ña cúú á ña ndaa jáchi cája mé á cuahá ndivaha ña náhnu xihín ña xítuhún ndivaha. Ta nachindahá Ndióxi ínimá yii mé á nuú na cúú cuéntá Jesús ña ná caja na ña xítuhún tá quiahva nasacu ini mé á caja na.

Nanduu Jesucristo in ñayivi

⁵ Coó nasahan toho Ndióxi ñamaní nu tátó mé á ña ná cacomí na cuéntá sahá ñuyiví saá, ña vaxi chága chí nuu. ⁶ Jáchi já cáchí tuhun Ndióxi já:

Tátá Ndióxi, coó saha toho ñayivi ta coó ña náha cúú ná.

Joo mé ndó ñúhu ini ndó saha ná ta ndíhi ini ndó saha ná.

⁷ Tá nacavaha ndó ñayivi nandaja ndó na nanduu na ña náhnu ndivaha.

Ta tátó mé ndó cuití va cúú ná nasayojó loho nu ná tixi chá tiempo.

Ta tóco ndíhi ña nacavaha ndó nandiquiahva ndó ña ndahá ñayivi,

⁸ já ná cacomí na cuéntá sahá, cáchí tuhun Ndióxi. Ta mé a ndaa ni in ñaha coó nacandoo xóo jáchi nasacu ini Ndióxi cacomí ñayivi cuéntá saha tóco ndíhi ñaha joo cámani yii va xinu coo mé quivi cán. ⁹ Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndáha chága mé á nu tátó Ndióxi jáchi sahá ña quíhvi ini Ndióxi mí sahá ña cán quea nasacu ini a ña ná quivi Jesucristo sahá ndíhi ñayivi. Ta viti nandindita mé á nanduu a ña cáhnu ndivaha sahá ña nandoho a tá naxihí a ndica crúxu.

10 Tóco ndihi ñaha ña ñacavaha Ndióxi cúú á cuéntá mé á sahá ña ñacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun ñatahnda nu á ña ná jácacu a mí. Jáchi ña cúni Ndióxi cúú ña ná canduu ndihí, ña cúú cuéntá mé á nu íin a. 11 Nandaja víi Jesucristo mí ta sahá ña yóho cúú yó jahyi Ndióxi. Ta viti Ndióxi cúú tátá ndihí ta cúú á tátá Jesucristo. Ña cán queá co cácan toho nuú Jesucristo cahan ñani a mí ta cahan quiahva mí viti. 12 Jáchi ñacahyi ini tuhun Ndióxi ña ñacahan Jesús xihín tátá a. Ta ñacachi a já:

Ndicani i nuú ñani i saha mé ndó.

Ta nu ndítútú ña cata i caja cáhnu i ndohó, cáchí Jesús.

13 Ta cáchí tucu a já:

Yehe cándeé ini i Ndióxi, tátá i.

Ta cáchí tucu a já xihín Ndióxi:

Yóho íin i xihín ndihi jahyi ndó, ña ñasahan mé ndó nuú i cacomí i cuéntá saha, cáchí Jesús.

14 Sahá ña íin yiquí cuñu ñayivi, ña cúú jahyi Ndióxi sahá ña cán queá ñanduu Jesús in ñayivi ta ñasahin yiquí cuñu a tátuhun mí. Ta tá ñaxihí yiquí cuñu a já ñacandeé a ñasahnu a nuú tiñáhá sacuahá, rí cája ña xihí ñayivi. 15 Ta xihín ña yóho najácau a tóco ndihi ña ñasayihví quivi jáchi ní tiempo ñasanduu na ndáha tiñáhá sacuahá sahá ña yíhví ña. 16 Jáchi mé a ndaa coo ñaquixi Jesucristo ña ná chindeé a ña cúú tátó Ndióxi. Ña ñaquixi mé á caja queá chindeé a ñayivi, ña

cándeé ini Ndióxi tá quiahva ñacandeeé ini Abraham Ndióxi. ¹⁷ Ña cán queá ñaxini ñúhú Jesús nduu a in ñayivi cácu ñuyiví yóho tátuhun mí. Ta xihín ña ñandoho a ñaxinu a ñanduu a in jutú sacuaḥa nu Ndióxi indiví. Ta ñaxihí a ndica crúxu sahá cuachí jáchi cája ndaa mé á tóco ndihi ñaha ta táhvi ini a saḥa yo. Ta xihín ña yóho ñacaja cáhnu ini a sahá cuachí. ¹⁸ Ta sahá ña ñandoho ini mé á ta sahá ña ñaxito ndojó rí quini mé á sahá ña cán queá xini a ndá quiahva ndóho ini. Ña cán queá cuu chindeé a ndaja táhan ña ndóho ini, ña xito ndojó tiñáhá sacuaḥa.

3

Cáhnu chága Jesús a juú ga Moisés

¹ Candehé ndo, ñani i, ña cúu cuéntá Jesús. Mé ndó cúu ndó ña ñacaxi Ndióxi cacomí a cuéntá saḥa. Candehé ndó Jesucristo, mé á cúu á tátuhun apóstol, ña ñachindahá Ndióxi cacuu jutú sacuaḥa saḥa yo nu Ndióxi sahá ña cándeé ini mé á. ² Ta xihín ndinuhu ini a ñacaja chúun a cuéntá Ndióxi, mé a ñacaxi ñahá. Jáchi tá quiahva ñacaja Moisés tóco ndihi ña cúní Ndióxi tañu ña cúu cuéntá mé á quiahva já ñacaja Jesús tóco ndihi ña cúní Ndióxi, tátá a. ³ Joo ndítahan ndicáhnu chága Jesús a juú ga Moisés jáchi cáhnu chága Jesús a juú ga Moisés. Cúu á tátuhun tá cávaha in dataa in vehe ta ndítahan ndicáhnu chága mé dá a juú ga vehe da. ⁴ Ndúsa coo in da cávaha vehe já cuu cavaha ña joo tóco ndihi ñaha íin a jáchi ñacavaha Ndióxi ña. ⁵ Ña cán queá ñacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun ñacaja

da quéa cáxi tũhun jĩni da xihĩn ná ña cunĩ Ndióxi caħan xihĩn ná chága chí nuu. ⁶ Joo jĩn va chuun naçaja Jesús, mé á cúú in túhũn jini já jahyi Ndióxi jáchi cómi a cuénta saħá na cúú cuénta mé á xihĩn ndinuhu ini a. Cuénta mé á cúú mí tá ndacú coo ínima yó ta tá ná candeé ini mé á. Ta xini ñuhú cajii ini candatí anda quixi mé á.

Cúni Ndióxi ña ná ndihvi na cúú cuénta mé á nuú ndiquehe ndéé ná

⁷ Candehe ndó ndá quiahva cáchi ínima yii Ndióxi ini tũhun mé á tá cáchi a já:

Tá ná cuni joho ndó ña caħan Ndióxi xihĩn ndó quivi víti,

⁸ a cája sáa ini ndó xihĩn á tá quiahva naçaja na Israel tá naçica nuu na yucú íchí cán.

Jáchi nandĩnehe yũhu ná nu Ndióxi ta ihvi ndivaha naçacuu ini na xihĩn Ndióxi.

⁹ Ta já cáchi Ndióxi já:

“Mé yucú íchí jañ naçito ndojó tásahnu jícó ndó yehe,

vatí naçini na ña náhnu ndivaha naçaja i tixi ivi jícó cuia.

¹⁰ Saħá ña cán quéa naçojo ini i xihĩn tóco ndihi na cán,

ta naçachi i saħa ná ña cúú ná na cáhvi ivi, joho ini, ta sáa ini na caca na íchi cuénta mí i.

¹¹ Saħá ña cán quéa naçojo ini i xihĩn ná, ta naçahan i tũhun i ña a quiahva toho i ñamanĩ nu ná

ndihvi na nuú ndiquehe ndéé na xihĩn i”, naçachi Ndióxi xihĩn na Israel.

12 Ña cán quéa cuénta vaha coo ndó, ñani i já ná a cáñe ndó ínima quini ña jácaxoo ndó nu Ndióxi, ña tácú, sahá ña co cúni ndó candúsa ndó mé á.
 13 Ña ndítahan caja ndó quéa quiahva tuhun ndeé ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cúni Ndióxi. Jáchí co cúni a ña ná jándahvi ña núu ñuyívi yóho ndohó ta já ná ndisáá ini ndó nu Ndióxi.
 14 Jáchí tá ná candeé ndusa iní mé á janda quiahva ná xinu quivi nu ndíhí cuíi tá quiahva ñacaja í janda saha já quéa cúni cachi a ña in nanduú xihin Jesucristo.

15 Jáchí quiahva já cáchí tuhun Ndióxi:

Tá xíni joho ndó ña cáhan Ndióxi xihin ndo quivi víti,

a cája sáá ini ndó xihin á tá quiahva ñacaja na Israel tá nandiñehe yúhu ná nu Ndióxi yucú íchí cán, cáchí a.

16 Jáchí sa xíni ndó ndá na nandiñehe yúhu nu Ndióxi tá naxini joho na ña ñasahnda mé á nu ná. Na cán cúu na tóco ndihi na ñasandaca Moisés tá ñaqueta na nación Egipto. 17 Ta xihin mé na cán ñaxojo ini Ndióxi tixi ivi jíco cuia jáchí ñacaja na cuachi nu mé á ta sahá ña cán quéa ñacuyu na ñaxihí na yucú íchí cán. 18 Ta sahá ña coó ñaxeen na caja na ña cúni Ndióxi sahá ña cán quéa ñasahan Ndióxi tuhun a ña a quiahva toho a ñamaní nu ná canduu na nuú ndiquehe ndée na xihin á. 19 Ta mé a ndaá cándaá iní ña coó ñacuu ndihvi na nuú ñasacu ini Ndióxi coo na sahá ña co ñaxeen na candúsa na mé á.

4

¹ Sahá ña cán quéa viti sáhan yij va Ndióxi ñamāni nu yó yaha í nuú nasacu ini mé á ndiquehe ndée yo xihín á. Joo xíní ñúhú cuéntá vaha coo ndó jáchi tiahva náa a xínu coo java ndó ndihvi ndó cán.

² Jáchi tá quiahva naxini johó na Israel tuhun Ndióxi quiahva já naxini johó í tuhun mé á, ña cáchí a cúní jácācu Ndióxi ñayivi. Joo coo nacandúsa na cán ña sahá ña cán quéa coo chuun a nu ná. ³ Joo mí cúú yó na cāndéé ini Ndióxi ta sahá ña yóho tandaa quiví xínu coo í ndihví nuú ndiquehe ndée yó xihín á. Ta já cáchí Ndióxi já sahá ña yóho:

Naxojo ini i xihín na co cāndúsa yehe, sahá ña cán quéa nasahan i tuhun i ña ná a ndihvi toho na nuú nasacu ini i ndiquehe ndée ná xihín i, cáchí a.

Nacachi Ndióxi ña yóho vatí sa nacaja tiahva mé á nuú ndihvi na ndiquehe ndée na anda tá nacava sahá saha ñuyíví. ⁴ Ndáa ini tuhun Ndióxi ña nacaja mé á quiví usa. Já cáchí a já:

Quiví usa nandiquehe ndée Ndióxi nuú chuun nacaja tá nacavaha tóco ndihi ñaha, cáchí tuhun Ndióxi.

⁵ Ta já cáchí tucu a já sahá na co cāndúsa Ndióxi: A ndihvi toho na canduu na nuú ndiquehe ndée ná xihín i, nacachi a.

⁶ Ta coo nandihvi toho na nacahan Ndióxi xihín nu cuítí cán jáchi coo naxeen na candúsa na mé á. Joo núná yij va nuú java ñayivi ndihvi na ndiquehe ndée ná xihín mé á. ⁷ Jáchi nasacu Ndióxi inga quiví ta cúú á quiví viti ta já cuu ndihvi ñayivi ndiquehe ndée na xihín mé á. Sanahá ndivaha

naçahan Ndióxi xihin rey David sahá ña yóho ta naçahyí da ña ta já cáhí a já:

Tá xini joho ndó ña cahan Ndióxi xihin ndó quivi víti a cája sáa ini ndó xihin á, cáhí tūhun Ndióxi.

⁸ Ta sa xini yo ña coó najándihvi Josué ñayivi nu ndiquehe ndée na xihin Ndióxi jáchi naçahan Ndióxi sahá inga quivi vaxi chága chinu. ⁹ Sahá ña cán quéa sa xini yo ña cámani xinu coo quivi ndiquehe ndée na cúu cuénta mé á tá quiahva nandiquehe ndée mé á quivi usa. ¹⁰ Jáchi ndá na ná ndihvi ndiquehe ndée nu ín mé á cán já quéa ndiquehe ndée ná nuú chuun naçaja na tá quiahva nandiquehe ndée Ndióxi nuú chuun naçaja mé á. ¹¹ Sahá ña cán quéa ndítahan ndihi ini ndihvi nuú ndiquehe ndée yo cán. Ta ná a cája í tá quiahva naçaja na Israel cán tá coó naxeen na candúsa na nuú naçahan mé á xihin ná.

¹² Ín cuaha ndée tūhun Ndióxi ta cúu á tátūhun ña tácu. Ta ín chága ndée tūhun Ndióxi a juú ga in yúchu ña ivi yúhu. Ta tá quiahva quihvi yúchu ña ivi yúhu tá sáhdá yiquí cuñu quiahva já quihvi tūhun Ndióxi janda maá ini ínima ñayivi xihin xini túni ná ta já xinu a ini na. Ta náha ndá quiahva cáhvi ini na. ¹³ Jáchi xini Ndióxi tóco ndihi ñaha ta a cuú chijehé yo ña cáhvi ini jáchi sándehe mé á tóco ndihi ñaha naçavaha mé á. Ta vaxi quivi nahma yó nu mé á tóco ndihi ña naçaja í.

Jesús cúu á jutū saçuaha nuú ndihí indiví

¹⁴ Mé Jesús cúu á jutū saçuaha nuú ndihí sahá ña cán quéa co ndítahan jándacoo í ña cándée ini Jesús, mé a cúu in túhún jini já jahyi Ndióxi. Ta nandihvi

a indiví nū íin Ndióxi. ¹⁵ Ta cándáhví ini Jesús mí jáchi cúú á jutū sacuaḥa nū yō ta cándaḡ ini a ña cúú yó ñayivi vitá ndivaḥa ini. Jáchi tá naxica nuu a ñuyíví yóho naxito ndojó tiñáhá sacuaḥa mé á xihín tá nuú ñaha tá quiahva cája rí xihín mí joo ni in túhún cuachi coó naçaja mé á. ¹⁶ Ña cán quéa a cáyihví toho í cayatí nū íin coo Ndióxi, mé a quíhví ini a mí jáchi táhví ini a saḥa yō ta chindeé a mí tá ná caça i ñamañi nū á.

5

¹ Tóco ndihi da cúú jutū sacuaḥa chága nū ndíhi jutū cúú dá da sá caxi na tañu ñayivi Israel já ná caḥan cuachí da saḥá ñayivi nū Ndióxi. Ta jári jóco da ñaha nū Ndióxi ta sáhní da quítí nū náa saḥá cuachi na. ² Ta saḥá ña cúú dá da vitá ini, da ñuyíví yóho saḥá ña cán quéa cuu candáhví ini da ñayivi, na co xíní ña sáhdá Ndióxi. Ta cuu candáhví ini da na cája cuachi. ³ Ta saḥá ña vitá ini da saḥá ña cán quéa ndítahan cahní da quítí jóco da rí nū Ndióxi saḥá cuachi mé dá xihín saḥá cuachi ñayivi viti.

⁴ Ta ni in da cán a cúu chinúu da mé dá cacuu da jutū sacuaḥa chága nū ndíhi jutū. Jáchi xíní ñúhú cacuu da da naçana Ndióxi caja chúun cuéntá mé á tá quiahva naçaja Ndióxi sanahá tá naçana mé á Aarón ña ná caja chúun da cuéntá mé á. ⁵ Quiahva já nayaha xihín Jesucristo jáchi coó naçhinúu a mé á ña ná nduu a jutū sacuaḥa. Ndióxi quéa naçhinúu ñahá tá nañdaja cáhnu a Jesús. Ta já naçachi Ndióxi já xihín á:

Jahyi yeḥe cúú yóhó,

ta viti cáchí i ña nanduu u tátún, cáchí a.

⁶ Ta inga nū caḥan tuhun Ndióxi já cáchí a já:

Anda ama cáa quivi cacuún jutú,
ta cajún tá quiahva nacaja in jutú, da nasananí
Melquisedec sanahá, cáchí a.

⁷ Nani nasahin Jesucristo ñuyíví yóho a juú quiahva naxica tahví a nu Ndióxi. Ta java tañu nasacu a ta java tañu nacayuhú a nu Ndióxi, mé a cúú chindeé ñahá ña ná a quíví toho a. Ta sahá ña nasacaja Jesús tóco ndihi ña sáhdá Ndióxi, tátá a sahá ña cán quéa naxini johó Ndióxi nu cáhan mé á.
⁸ Ta vatí cúú Jesucristo in túhún jini já jahyi Ndióxi joo xihín ña nandoho ini a ñuyíví yóho nacatiahva coo johó a nu cáhan Ndióxi, tátá a xihín á. ⁹ Ta xihín ña yóho najáxinu coo mé á nacaja tóco ndihi ña natahnda nu á caja. Janda jáví nacuu jácacu a mí ña ná coo í xihín mé á anda ama cáa quivi tá ná caja í ña sáhdá mé á. ¹⁰ Ta nandicojo a chuun nacaja Ndióxi ña ná nduu a jutú sacuaḥa tátuhun mé jutú, da nasananí Melquisedec.

Cuénta coo ndó ná a jándacoo ndó ña cándeé ini ndó Jesús

¹¹ Ín cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchi coo cúni ndo taa johó ndó nu cáhan i.
¹² Anda jihna nandihvi ndó íchi cuénta Jesús ta viti sa ndítahan nu ndó jánahá ndó tuhun Ndióxi nuú ñayivi. Joo coo cája ndó já jáchi nacavitá ndo ta tucu tucu jácuaha ndó ña coo íhvi toho. Ta viti cúú á tátuhun coo ndeé ini ndó cuxu ndó ña xíxi ñayivi náhnu joo ña cája ndó quéa xíhi yji va ndó leche tátuhun na valí va. ¹³ Ta tá quiahva xíhi na valí leche quiahva já cája ri na coo tiáhva ndícuni ndía cúú ña vaha ta ndía cúú ña núu. ¹⁴ Joo ñayivi,

na cándaā vaha ini tuhun Ndióxi cúú ná tátuhun ñayivi nánnu, na tácu ini, na xíxi cuñu va jáchi sá tiahva na ndícuni na ndía cúú ña vaha ta ndía cúú ña núu.

6

¹ Sahá ña cán quéa ña ndítahan caja í quéa ndindacú chága yó xihín ñaha Ndióxi janda quiahva ná xinu coo í cacuú ñayivi tácu ini xihín ñaha Ndióxi. Co ndítahan jácuaha tucú ña najácuaha í tá jacá nandihví íchi cuéntá Jesús jáchi ndítahan catiahva í ña jan. Ndítahan cándaā iní ña cacu ndaa ínima yó sahá ña cándéé iní Jesucristo cuití va ta co cúú á sahá ña cája í ña vaha. ² Ta sa cándaā iní ña ndítahan candúta na cúú cuéntá Jesús. Ta sa cándaā iní ndaja cája í chinúu ndáha yó jiní ñayivi tá xíca tahví yó nu Ndióxi saha ná. Ta sa cándaā iní ña vaxi quivi nditacu tucu tóco ndihi ndii ña ná caja vii Ndióxi saha ná. ³ Sahá ña cán quéa cáchi í xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yó.

⁴ Ta a cuú ga ndicó coo ñayivi nu Ndióxi tá sa najándacoo na ña nasandéé ini na mé á. Jáchi sa najándiyéhe Ndióxi ínima ná ña ná candaā ini na saha mé á ta sa xini na ndá quiahva in ñaha Ndióxi. Ta janda ínima yii Ndióxi sa nandacaan ínima ná. ⁵ Ta sa nacandaā ini na tuhun vaha cáhan sahá Jesucristo ta sa nacandaā ini na ndá quiahva nánnu caja Ndióxi chága chí nuu. ⁶ Joo tá ná jándacoo na jan ña cándéé ini na Ndióxi já quéa a cuú ga ndicó coo na nu mé á jáchi xihín ña cája na cúú á tátuhun cata caa tucu na Jesucristo, jahyi Ndióxi ndica crúxu ta já sácu ndaa na mé á nuú

ñayivi. ⁷ Jáchi sa xín̄i ndo ndaja íin ñundáhyi nu cúun vaha javi ta ndíndahyi a. Ta tá ná cana cuahá ñaha nuú naxutu ñayivi cán já quéa cúni cachi a ña cája Ndióxi ñaman̄i xihín ñundáhyi cán. ⁸ Joo tá ná nana tohiñú xihín tochihmá nu ñúhu cán já quéa coó saha toho a ta ña yóho cúni cachi a ña co cája toho Ndióxi ñaman̄i xihin̄ a ta vaxi quivi cayi a caja Ndióxi.

Vaxi quivi coo í xihin̄ Ndióxi tá co jándacoo í íchi cuéntá mé á

⁹ Candehé ndó, ñani man̄i i, na cúu cuéntá Jesús. Vatí cáhan nde ña yóho xihin̄ ndo joo cándéé ini nde ndohó ña cája tá cája ndó ña vaha ña ndítahan caja na cándéé ini Jesús. ¹⁰ Ta xín̄i nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindeé ndó na cán. ¹¹ Ta a juú quiahva cúni nde ña ná ndihi ini in in ndó chindeé ndo na cúu cuéntá Jesús anda quivi nu ndíhí. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo. ¹² Co cúni nde ña ná cajúsá ndo caca ndó íchi cuéntá Jesús. Ña cúni nde quéa ná ndihi ini ndó caja ndó tá quiahva cája na cándéé ini Ndióxi, na coó najándacoo ña cándéé ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

¹³ Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coó inga ga ña cáhnu chága a juú ga mé á. ¹⁴ Ta tá nasahan mé á tuhun a nu dá já nacachi a já xihin̄

dá: “Mé a ndaa caja cuahá i ñamaní xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá. ¹⁵ Ta coó nandihí ini Abraham nani nasandati da jáxinu coo Ndióxi tuhun a ta chí nañehe dá ña nasahan Ndióxi tuhun a quiahva nu dá. ¹⁶ Tá sahan ñayivi tuhun na nuú inga ñayivi já tává na quiví in na cáhnu chága a juú ga mé ná ña ná cacuu na testigo. Jáchi cája ndúsa in testigo xihín ná jáxinu coo na ña nasahan na tuhun na caja na. ¹⁷ Sahá ña cán quea natavá Ndióxi quiví mé á jáchi cúni a jánaha cáxi a nuú ñayivi ña a ndíjama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a. ¹⁸ Ta cánda iní ña nasahan Ndióxi tuhun a nu yó ta natavá a quiví á cacuu a testigo ta xihín ndíví ña yóho sa xini ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí. ¹⁹ Sahá ña cán quea cátivi tuun í xihín Ndióxi ta cándeé iní ña quiahva mé á nu yo ña sahan tuhun a quiahva nu yo. Ta sahá ña cándeé cáhnu iní mé á sahá ña cán quea co yíhvi toho í cayatí nu mé á jáchi sa nandihvi Jesús nuú yíi ndivaha indiví. ²⁰ Ta cúni Jesús chindeé a mí ña ná xinu coo í nu ín a cán sahá ña cán quea nandihvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quiví cája mé á chuun yóho tá quiahva nacaja da nani Melquisedec sanahá ndivaha.

7

Chuun ñacaja Melquisedec sanahá

¹ Mé Melquisedec yóho ñasacuu da rey nuú ñayivi ñuu Salem ta ñasacuu da jutū nū Ndióxi, mé á cúú ña cáhnu chága a juú ga inga ga. In tañu tá nandicó coo Abraham ñasahan da ñacani táhan da xihín java rey ta najándihi da sahá na cán já ñaqueta Melquisedec íchi nuú vaxi Abraham ta já ñacaja yij dá Abraham. ² Ta mé Abraham nandaja da uxū táhndá tóco ndihi ña ñacandaa da ndáha java rey tá ñaquee vaha da xihín na cán. Ta já ñasahan da in táhndá nuú Melquisedec. Ta quivi Melquisedec yóho cúni cachi a rey, da cája ña ndaa. Ta sahá ña cómi da cuénta sahá ñuu Salem, ña cúni cachi a nuú ín vaha ini ñayivi sahá ña cán quéa cúú dá rey, da cája ña ná coo vaha ini ñayivi. ³ Ta ni in ñayivi co xini na saha tátá náná mé Melquisedec yóho ta co ndaa nuú tutu quivi tásahnu jícó da. Ta co xini na ndá tañu ñacacu da ta ni co xini na ndá tañu naxihi da. Joo ña xini na quéa cúú dá jutū anda ama cáa quivi tá quiahva cúú Jesucristo jutū anda ama cáa quivi, mé a cúú in túhún jiní já jahyi Ndióxi.

⁴ Ta viti cuu candehé ndó ndaja cáhnu ñasacuu Melquisedec jáchi janda mé Abraham, da ñasacuu tásahnu jícó yo ñasahan da nuú Melquisedec in táhndá nuú uxū táhndá ñaha ña ñacandaa da ndáha rey, da ñaquee vaha da xihin cán. ⁵ Ta sa xini ndo ña cáchi ley Moisés ña ín saha nuú jutū, na ñaquixi chichi Leví ndiquehe na in táhndá nuú uxū táhndá ña cómi na Israel. Jáchi mé jutū cán cája chúun na nū Ndióxi cuénta táhan na na Israel vatí in cúú tóco ndihi na sahá ña ñaquixi ndihi na chichi

Abraham. ⁶ Vatí coó naquixi Melquisedec yóho chichi Leví joo naquehe tá naquehe da in táhndá nuú uxu táhndá ñaha nu Abraham, da nasahan Ndióxi tuhun a nuu ña caja cuahá ñamaní xihin. Tá naçaja yii Melquisedec Abraham ⁷ náha ña mé a ndaa cáhnu chága da cája yii ñayivi a juú ga na naçayii cán. Ta ni in na a cuú cachi na ña co cuú ña yóho ña ndaa. ⁸ Ta sa xini yo ña cáhnu chága Melquisedec a juú ga jutú, na naquixi chichi Leví, na quehe in táhndá nuú uxu ñaha jáchi cuú ná ñayivi, na ndihi saha. Joo cáhan tuhun Ndióxi sahá Melquisedec tátuhun tácu yii va da. ⁹ Ta náha ña cáhnu chága Melquisedec a juú ga Leví, da cuú tásáhnu jícó tóco ndihi jutú, na quehe in táhndá nuú uxu a cán. Jáchi cuú á tátuhun nachahvi Leví in táhndá nuú uxu a tá nachahvi Abraham ña nu Melquisedec. ¹⁰ Jáchi tá naquehe Melquisedec in táhndá nuú uxu ñaha nu Abraham, cuú á tátuhun nasañehe Abraham tóco ndihi na vaxi chichi da ini yiquí cuñu da jáchi cámaní yii cacu na mé tiempo já.

¹¹ Ta tóco ndihi jutú, na naquixi chichi Aarón, naquixi na chichi Leví viti. Ta vatí naçaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihin mé ley. Sahá ña cán quea nachindahá Ndióxi Jesucristo ñuyivi yóho já ná cacuu a inga jutú, ña ná caja tá quiahva naçaja Melquisedec sanahá. Ta coó naçaja mé á tá quiahva naçaja Aarón, da nasacuu tásáhnu jícó jutú cán. ¹² Ta tá nachindahá Ndióxi in jutú saá xini ñúhú a ndijama ri a ley va. ¹³ Ta mé jutú saá cuú Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví

ta ni coó naquixi a chichi Aarón. Jín va chichi naquixi a ta ni in da taa naquixi chichi cán a ñáha cacuu da jutú. ¹⁴ Joo cándaá vaha ini ñayivi ña naquixi Jesucristo chichi Judá ta co cúú á chichi nu sá cana jutú ta ni coó naçahan Moisés sahá na quíxi chichi Judá tá naçahan da sahá na cacuu jutú.

¹⁵ Ta cándaá vaha chága iní ña yóho jáchi sa xíní yo ña mé jutú saá ña cúú Jesucristo nandiquehe a chuun tátuhun naçaja Melquisedec sanahá. ¹⁶ Ta coó nanduu a jutú sahá ña naçacu a chichi Leví nu sá cacu jutú. Joo nanduu a jutú sahá ña cúú cája tóco ndihi ñaha ta sahá ña tácu a anda ama cáa quivi. ¹⁷ Jáchi tá çahan Ndióxi saha Jesucristo já cáchi a já:

Yóhó cúún jutú anda ama cáa quivi,

tátuhun mé jutú, da naçananí Melquisedec jáchi cájún chuun tá quiahva naçaja mé dá, cáchi tühun Ndióxi.

¹⁸ Sahá ña cán quea naçandoo xóo ley Moisés jáchi coó chuun a ta a cuú chindeé a ñayivi. ¹⁹ Ta ni coó naçuu caja mé ley Moisés ña ná nduu ndaa ñayivi nu Ndióxi. Joo viti cájii iní jáchi xihín ña naçaja Jesucristo já cuu nduu ndaa yó nu Ndióxi ta já cuu cayatí nu mé á.

²⁰ Ta tá naçaja Ndióxi ña nanduu Jesucristo jutú já naçahan tühun a ta naçacu a mé á cúú á testigo sahá. ²¹ Joo tá nanduu na naquixi chichi Leví cán jutú coó naçahan Ndióxi tühun a saha ná tá quiahva naçaja xihín Jesucristo tá nanduu a jutú. Ta já naçachi Ndióxi ini tühun mé á:

Yehe cúú Ndióxi ta nasahan i tuhun i nu yóhó ta a ndíjama toho i tuhun cáhan i:

“Nachinúu i yohó cacuún jutú anda ama cáa quivi.

Ta cajún chuun tá quiahva nacaja Melquisedec sanahá”, cáhí Ndióxi.

²² Sahá ña nandicojo Jesucristo chuun nasahan Ndióxi nu á sahá ña cán quéa cándéé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés. ²³ Ta ndaja coo nasanduu cuahá jutú, na naquixi chichi Leví cán jáchi naxihí ndihi na ta nacandoo chuun na nuú inga na. ²⁴ Joo tácu Jesucristo anda ama cáa quivi ña cán quéa a jándacoo toho a chuun a nuú inga ga. ²⁵ Ña cán quéa anda ama cáa quivi ín tiahva Jesucristo jácau a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta ín mé á nu Ndióxi xíca tahví a nu mé á sahá na cándéé iní mé á.

²⁶ Mé a ndaa xíní ñúhú yo Jesucristo ña ná cacuu a jutú sacuahá nu Ndióxi saha yo. Jáchi mé á cúú á ña yíi ndivaha ta ni in cuachi coo nacaja mé á ta ni in cuachi a cúu chícaan yó jatá. Ta co xíca nuu ga mé á tañu na cája cuachi jáchi ín a indiví nu ndicáhnu ndivaha mé á. ²⁷ Co xíní ñúhú caja Jesucristo tá quiahva nacaja java ga jutú sacuahá, na naquixi chichi Leví. Jáchi nini quivi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jáví nacaja na ña sahá cuachi ñayivi. Joo jíin va nacaja Jesucristo jáchi in túhún tañu cuítí va najoco a mé á tá naxihí a ndica crúxu sahá cuachi tóco ndihi ñayivi. ²⁸ Tá nacaja na ña cáhí ley Moisés já nasacu na in dataa, da cája cuachi

ñã ná cacuu da jutu sacuaḥa. Joo tá nãndihi já nãchinúu Ndióxi Jesucristo, jahyi a ñã ná cacuu a jutu sacuaḥa, ñã cája ñã ndaa anda ama cáa quivi. Ta nasahan Ndióxi tuhun a nu yo ñã jáxinu coo a tóco ndihi ñã cáchi a.

8

Jesús cúu á jutu sacuaḥa saḥa yo indiví

¹ Nacachi nde ñã yóho ñã ná candaa ini ndó ñã cúu Jesucristo jutu sacuaḥa saḥa yo nu Ndióxi ta ín coo a xoo cuáha Ndióxi indiví nu ndicáhnu ndivaha mé á. ² Cúu á jutu sacuaḥa cája ndíví a veñuhu indiví ñã nacavaḥa Ndióxi ta coo cúu á ñã nacavaḥa ñayivi. ³ Ndítahan nu tóco ndihi na cúu jutu sacuaḥa cahní na quíti nu Ndióxi ta joco na ñaha nu á. Ñã cán queá ndítahan ri nu Jesucristo joco a ñaha nu Ndióxi. ⁴ Tá ná caca nuu Jesucristo ñuyiví yóho, nduu já queá a cácuu toho a jutu, nduu. Jáchi sa ndúu cuahá ndivaha jutu ñuyiví yóho ta joco na ñaha nu Ndióxi tá quiahva sáhdá ley Moisés. ⁵ Joo ñã cája mé ndihi jutu ñuyiví yóho cúu á tátuhun yuhú nu ñã cája Jesucristo indiví. Ta cándaa iní ñã cúu á tátuhun yuhú nu ñã ín indiví jáchi sanahá ndivaha tá nasahnda Ndióxi chuun nu Moisés ñã ná cavaha da veñuhu xihin ní quíti já nacachi Ndióxi já xihin da: “Cuénta coún ndaja cavahún veñuhu xihin ní quíti jan. Jáchi xini ñuhú coo a tá quiahva cáa ñã nanaha i nuún jiní yucu cán”, nacachi Ndióxi xihin Moisés. ⁶ Joo Jesucristo, mé á cúu jutu sacuaḥa saḥa yo indiví nãndicojo a in chuun ñã vaḥa chága a juú ga chuun cája jutu ñuyiví. Vaḥa chága ñã nacaja

Jesucristo a juú ga ley Moisés jáchi jándique táhan máni a mí xihin Ndióxi ta xihín ña yóho xínu coo tuhun nasahan Ndióxi nu yó jihna.

⁷ Tá ná cuu caja ley Moisés ña jácacu a mí ná a cühun toho í indayá, nduu já quéa co xini ñuhú quivi Jesucristo jándique táhan máni a mí xihin Ndióxi, nduu. ⁸ Joo xini vaha Ndióxi ña mé ley Moisés a cuú jácacu a ñayivi sahá ña cán quéa já nacachi a já:

Vaxi quivi tá quiahva i tuhun saá nuú ñayivi Israel ta nuú na naquixi chichi Judá.

⁹ Jíin va cúu tuhun saá quiahva i nu ná, jáchi co cúu toho a tuhun nasahan i nu tásahnu jícó na sanahá ndivaha, tá natiin ndahá i na ta natavá i na nuú nasanduu na nación Egipto.

Ta sahá ña coo najáxinu coo na tóco ndihi ña nasahnda i nu ná caja na sahá ña cán quéa najándacoo i na.

¹⁰ Ta vaxi quivi tá quiahva i tuhun saá nuú ñayivi Israel.

Ta caja i ña ná candaá vaha ini na ley mí i ta cañuhu a ini ínimá ná ña ná caja na ña cúni mí i.

Ta yehe cacuu Ndióxi caja cáhnu na, ta mé na cán cacuu ñayivi cacomí i cuénta saha.

¹¹ Ta a cúni ñuhú ga na jánahá ñani táhan mé ná ña ná candaá ini na saha Ndióxi, jáchi tóco ndihi ñayivi anda na valí anda na sáhnu candaá ini na yo cúu yehe.

¹² Ta caja cáhnu ini i saha ndaja táhan ña núu nacaja na, ta a ndícuñun ga ini i sahá cuachi na, cáchí Ndióxi.

¹³ Tá naçahan Ndióxi sahá tuhun saá ña quiahva mé á nuú ñayivi já quéa náha ña coó chuun ga mé tuhun naçahan nü ná jihna ta cama chá ndihi sahá.

9

Veñuhu ñuyívi xihín veñuhu indiví

¹ Tá naçahan Ndióxi tuhun a nuú na Israel sanahá ndivaha já naçahanda chuun sahá ndaja caja cáhu na mé á ini veñuhu ña cávaha na ñuyívi yóho. ² Ta ndácaan ivi cuarto ini mé veñuhu cán. Ta ña ndácaan ini cuarto nü cuítí cúu in candeleró xihín in mesa nü cándójó pan yii. Ta mé cuarto nü cuítí yóho nani a in nuú yii. ³ Ta ín in jahmá ndeé ña ndájí nuu táhan tañu ndívi cuarto yóho. Ta cuarto ndácaan maá nani a nuú yii ndivaha. ⁴ Ta mé cán ín in nü náa ña naçavaha xihín jiuhun cuáán nü chíníhma jutu jusa vaha. Ta jári cán ín sato arca ñaha Ndióxi ta tócó ndihi jata mé sato arca nandicuchu xihín jiuhun cuáán. Ta chí ini sato cán ndácaan in tindoho jiuhun cuáán nü ñúhu maná ña naxixi na Israel tá naxica nuu na yucú íchí cán. Ta jári ndácaan mé yíto ñaha Aarón, dó naçaa núma sanahá. Ta chí ini arca cán ndácaan ri ivi yuu jáhdá nü ndáa ley naçahan Ndióxi nuú Moisés. ⁵ Ta jiní mé sato arca cán ndíndójó ña cúu yuhú nuu tátó Ndióxi nani a querubines. Cándójó a cán ña ná ndicuhun ini ñayivi ña ín Ndióxi cán caja cáhu ini a sahá cuachi na. Ta mé tátó Ndióxi cán ndícaan ndixi a cándójó a jata arca. Joo a cúu ndicani chága yo sahá ña yóho viti.

⁶ Já naçahiin tiahva tócó ndihi ñaha veñuhu. Ta ndijáá níi quivi nandihvi jutu cuarto nü cuítí cán

cája ndíví nā ñaha caja cáhnu na Ndióxi. ⁷ Joo in tañu tá nū cuía in túhún da cúu jutū saçuaha naquihvi da cuarto maá cán. Ta ñéhe da nīi quítī ña joco da nū Ndióxi sahá cuachi mé dá xihín sahá cuachi ñayivi. ⁸ Ta xihín ña yóho jánaha ínima yīi Ndióxi nū yo ña a cuú ndihvi ndá ñayivi nacuu cuarto maá nuú yīi ndivaha jáchi sa ín va cuarto nū cuítī. ⁹ Ta tóco ndihi ña yóho cúu á tátuhun yuhú nuu nuú ña ín tiempo viti. Ta sa xínī yo ña a cuú ndaja vií ñayivi ínima ná xihín ña joco nā nū Ndióxi tá sáhnī nā quítī ña quiahva na nīi rí nū mé á. ¹⁰ Jáchi tóco ndihi ña nacaja nā cán nasacuu a cuénta ña sáxī nā xihín ña xīhi na ta nasacuu a cuénta ndaja nandaja vií nā mé ná xihín ticuī. Joo já nanditahan cája na jandā quiahva tandaa quivī ndijama Ndióxi tóco ndihi ñaha jáchi a cúu ndaja vií nā ínima ná xihín ña yóho.

¹¹ Ta ndaja coo naquixi Jesucristo ñuyíví yóho ta nanduu a jutū, da saçuaha chága nū yo. Naquixi a ña ná quiahva mé á ña vaha Ndióxi nū yo. Joo viti ín a indiví cája chúun a tátuhun jutū veñuhu ña vaha chága cán. Cúu á veñuhu ña coó nacavaha ñayivi ta co cúu á ñaha ñuyíví. ¹² In tañu cuití va nandihvi a nuú yīi ndivaha ta coó nasañehe a nīi tijúhu ni nīi chélo ña joco a nū Ndióxi. Nīi mé á cúu dó naxīta ndīca crúxu saha yo ña ná cacu ndaa ínima yo anda ama cáa quivī. ¹³ Jihna nacaja ñayivi ña nacachi ley Moisés ta nū yiquí cuñu na naxihnu ndaa jutū níi tīndiquī á nīi tijúhu ta naxihnu ndaa ri da nā xihín yaá chélo, rí nasahmi na nū náa. Ta xihín ña yóho nandivií yiquí cuñu na nū Ndióxi. ¹⁴ Joo ndiyahvi chága nīi Jesucristo a juú ga nīi

quíti. Jáchi tá naxihí Jesucristo já nandivií ínima yo já ná a cajú ga yo ña co ndíyahvi cán ta ná cajú í tóco ndihí ña cúní Ndióxi. Nacaja ínima yíi Ndióxi, mé a tácu a anda ama cáa quívi ña ná ndiquiahva Jesucristo mé á ndáha Ndióxi já naxihí a ndica crúxu saha cuachi vatí coó toho cuachi mé á.

¹⁵ Ta sahá tuhun saá nasahan Ndióxi nu yo sahá ña cán quéa cahan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cajú cahnú ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúní candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. ¹⁶ Cúú á tátuhun tá cávaha in dataa tutu cuénta ña ñehe táhvi ná candoo ñaha nu ná. Joo xíní ñuhú candaá ini na ña mé a ndaa naxihí da jándacoo ñaha cán anda jávi ndíyahvi mé tutu cán. ¹⁷ Jáchi nani tácu da co ndíyahvi toho tutu nacavaha da sahá ñaha ndicoo táhvi da. Janda quiahva ná quivi da já ndíyahvi a. ¹⁸ Ña cán quéa tá nu cuítí nasahan Ndióxi tuhun a nuú ñayivi nacaja mé á ña ná quivi quítí ta xihín níi rí cán nandoo cuachi ñayivi. ¹⁹ Jáchi tá nandihí nacahan Moisés ley nasahan Ndióxi nuú ñayivi Israel já natiin da in yíto, dó nani hisopo ta nacató da loho cachi cuahá nu do. Ta nachindaxi da dó cán xihín níi chélo xihín níi tijúhu, dó nacava táhan xihín ticuí. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. ²⁰ Anda já nacachi da já xihín na Israel: “Xihín níi quítí yóho jáxinu coo Ndióxi tuhun a ña nasahnda nu ndó cajú ndó”, nacachi Moisés. ²¹ Ta quiahva já naxihnu ndaa Moisés níi quítí nuú veñuhu níi quítí

xihín nuú tóco ndihi ñaha ñúhu cán ña cája chúun na cája cáhnu na Ndióxi. ²² Jáchí cáhí ley Moisés ña xihín nji cuití va ndivií ndaja táhan ñaha, vatí a juú ndihi a. Ta janda quiahva ná cuita nji já cuu caja cáhnu ini Ndióxi sahá cuachi ñayivi.

Nandoo cuachí xihín nji Jesucristo

²³ Sahá ña cán quéa nanditahan nu Moisés ndaja vií da ñaha veñuhu ñuyíví yóho xihín nji quítí. Ta mé ñaha cán cúú á yuhú nu ña íin indiví. Joo ñaha íin indiví ndivií a xihín nji, dó vaha chága a juú ga nji quítí. ²⁴ Ta veñuhu ñuyíví cúú á yuhú nu cuití va ña íin indiví. Coó nandihvi Jesucristo nuú yji ndivaha veñuhu, ña nacavaha ñayivi. Joo nandihvi mé á indiví ta cán íin a viti ta cáhan mé á xoo mí nu Ndióxi. ²⁵ Jáchí da cúú jutú sacuaha nandihvi da tá nu cuía nuú yji ndivaha veñuhu joco da nji quítí nu Ndióxi. Joo ña nacaja Jesucristo quéa nandiquiahva a mé á quivi a saha yo ta in tañu cuití va naxita nji á ndica crúxu. ²⁶ Jáchí tá ná nditahan nuú Jesucristo quivi a cuahá tañu já quéa janda mé saha tá nacava sahá saha ñuyíví casahá quivi a, nduu. Joo a juú a já jáchí tá jalóho cúni ndihi saha tiempo viti já nacasaá Jesucristo ñuyíví yóho ta in tañu cuití va naxihí a sahá cuachi ñayivi. ²⁷ Quiahva já yáha xihín ñayivi jáchí in táláa tañu quivi na ta anda jáví ndítahan candichi na nu Ndióxi caja vií mé á sahá ña nacaja na tá nasanduu na ñuyíví yóho. ²⁸ Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyíví yóho joo a quíví ga ña jáchí quixi a ndiquehe a na ndátí tiahva cuhun coo xihín mé á indiví.

10

¹ Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nuu uun ña vaha ña vaxi nu yo. Jáchi mé ley yóho coo nacuu caja ndaja vii a ínima ñayivi vatí ná cayati na nu Ndióxi tá nu cuía sá sáhní na quíti joco na nu Ndióxi. ² Jáchi tá ná cuu ndivií ínima ná sahá ña cája na ña cáchí ley Moisés já quéa in tañu cuití va joco na nii quíti nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. ³ Joo tá nu cuía tá sá sáhní na quíti joco na nii rí nu Ndióxi já quéa ndicuhun ini na ña cómí na cuachi nu Ndióxi. ⁴ Jáchi a cuú jándoo na cuachi na xihín nii tíndiquí á xihín nii tijúhu.

⁵ Ña cán quéa tá jalóho cúni casa Jesucristo ñuyívi yóho já nacachi a já xihín Ndióxi, tátá a:
Co cúni ndó ña ná cahní ñayivi quíti joco na rí nu
ndó ta ni co cúni ndó ña ná joco na java ga
ñaha nu ndó.

Sahá ña cán quéa nasahan ndó in yiquí cuñu nuú i
já ná ndiquiahva i ña nu ndó.

⁶ Co cájii ini ndó tá ná cahmi na quíti nu náa joco
na rí nu ndó. Ta ni co táhán ini ndó tá ná
joco na java ga ñaha nu ndó ña ná jándoo na
cuachi na.

⁷ Sahá ña cán quéa já nacachi i já xihín ndó:

“Tátá Ndióxi, yóho ín i ta ín tiahva vi caja i nda ña
nacuu cúni ndó.

Jáchi quiahva já ndaa ini tuhun mé ndó sahá i”,
nacachi Jesucristo.

⁸ Nu cuití nacachi Jesucristo ña co cúni Ndióxi ña
ná cahní ñayivi quíti quiahva na nii rí nu á. Ta ni

co táhan ini a tá ná cahmi na quítj nu náa ña ná ndivií ínima ná. Ta ñacachi a ña yóho vatí sáhndá ley Moisés caja ñayivi já. ⁹ Joo tá ñandihí ñacachi Jesucristo já xihín Ndióxi: “Yóho ín i ta ín tiahva vi caja i ndá ña ñacuu cúni ndo”, ñacachi a. Ña cán quéa ñasacu xóo Ndióxi ña ñacaja na jihna ta viti ndíquehe vaha mé á ñayivi sahá ña ñaxihí Jesucristo ndica crúxu. ¹⁰ Ñacaja Jesucristo ña ñasacu ini Ndióxi caja sahá ña cán quéa ñacandoo vií uun tóco ndihí mí jáchi in táláa tañu ñandiquiahva Jesucristo yiquí cuñu a tá ñaxihí a sahá cuachí.

¹¹ Jihna ga ña ñacaja ndihí jutú cúu á ña nini quiví sándita da nu náa jóco da quítj nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho. ¹² Joo in tañu cuití va ñaxihí Jesucristo sahá cuachi tóco ndihí ñayivi já ná cuu cacu ndaa ínima ná anda ama cáa quiví. Anda jáví ñasacoo a xoo cuáha Ndióxi, tátá a indiví. ¹³ Ta cán ín coo a viti cándati a janda quiahva ná cacu Ndióxi na cándají mé á tixi sahá. ¹⁴ Jáchi in táláa tañu ñaxihí Jesucristo ndica crúxu ta xihín ña yóho ñandaja vií a ínima ñayivi, na ñacaxi mé á. ¹⁵ Ta sa xini yo ña cúu ña yóho ña ndaa jáchi já cáchí ínima yij Ndióxi já:

¹⁶ Vaxi quiví tá quiahva i tuhun saá nuú ñayivi Israel ta quiahva joho coo a.

Caja i ña ná candaá vaha ini na ley mí i ta caja i ña cañuhu a ini ínima ná.

¹⁷ Ta já cáchí tucu a já:

Caja cáhnu ini i sahá ndaja táhan ña núu ñacaja na ta a ndícuñun ga ini i sahá cuachi na, cáchí tuhun Ndióxi.

18 Ta sahá ña ñacaja cáhnu ini Ndióxi sahá cuachi ñayivi sahá ña cán quéa cō xíní ñúhú ga cahni na quítí ña joco na rí nu mé á sahá cuachi na.

Xíní ñúhú cayatí nu Ndióxi

19 Candehé ndo, ñani i, na cúu cuéntá Jesús. A cáyihví toho í viti ndihví nu ín Ndióxi, mé nuú yíi ndivaha jáchi ñaxihí Jesucristo sahá cuachí. 20 Ta tá ñandiquiahva mé á yiquí cuñu a já ñaxihí a ta xihín ña yóho ñasuná a íchi saá já ná cuu cayatí nu ín mé á. 21 Ta mé Jesús cúu á jutū saçuaha saha yo nu Ndióxi jáchi cómí a cuéntá sahá ndihí, na cúu cuéntá mé á. 22 Ña cán quéa xíní ñúhú cayatí nu ín Ndióxi xihín ndinuhu iní jáchi cándéé iní mé á. Cúu á tátuhun ñandoo yiquí cuñu í tá ñaxihí Jesucristo ndica crúxu. Ta viti cō ndítahan ndicani iní sahá cuachi ñacaja í jáchi ñajándoo mé á cuachí. 23 A jándacoo í ña cándéé iní Ndióxi ta ná candati tiaha í janda ná yaha ña cáchí mé á jáchi xíní vaha í ña jáxinu cōo Ndióxi tuhun ñasahan nu yo. 24 Ta ndítahan nu yo ndinducú yo ndaja caja í chindeé táhan í já ná quihví chága iní ñani táhan í. Ta ndítahan caja chága yó ña vaha. 25 Cō ndítahan toho caja í tá quiahva cája java na cúu cuéntá Jesús, na cō cúní nditaca xihín ndihí java ga na cúu cuéntá Jesús. Ña ndítahan caja í quéa jácahan chága táhan í ña ná taca í xihín java ga na cúu cuéntá Jesús jáchi sa xíní yo ña vaxi quiví quixi tucu Jesucristo ñuyíví yóho.

26 Tá sa cándaqa vaha iní ña cō ndítahan caja í cuachi ta chíñee tucú mí cuahan í cája í cuachi vatí sa cándaqa iní ña ndaa, a cuú ga ndoo cuachí nu Ndióxi. 27 Ta cáyihví yo candatí janda quiahva

ndoho ndivaha iní caja Ndióxi. Jáchi jácana mé á ñayivi nu ñúhu cáyi ita, mé nu ndihi sahá na ihvi mé á. ²⁸ Jáchi ndá na Israel, na co cuni caja ña sáhdá ley Moisés já quea ndítahan quivi na tá ná cacu ivi á uni testigo sahá na nu juéxe. Ta ni in na a cándáhví ini ñahá. ²⁹ Joo ndaja ga ví ndítahan ndoho ini na quehe núu Jesús, mé in túhún jini já jahyi Ndióxi. Jáchi cúu á tátuhun sáni nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínimá yii Ndióxi, mé a cája cuahá ñamaní xoho. ³⁰ Cándaa vaha iní yo cúu mé a nacachi ña yóho: “Yehe jándoho i ini ñayivi, na cája cuachi. Ta caja i ña ná chahvi na sahá cuachi na”, cáchí a. Ta já cáchí tucu Ndióxi, xitoho íjá: “Yehe caja vii sahá na cúu cuénta mí i”, cáchí a. ³¹ Mé a ndaa ndáhví nahá nacuu tá ná tiin Ndióxi mí ña ná chahví sahá cuachí jáchi mé á cúu á Ndióxi, ña tácu indiví.

³² Ndítahan ndicuhun ini ndó ña nayaha tá jacá nacandee ini ndó Jesús. Vatí nandoho ndivaha ini ndó nacaja java ñayivi joo nasahan ndee ini ndó. ³³ Java tañu nasacu ndaa ichi na ndohó nuú ñayivi ta java tañu nacaja xixi na xihin ndo ta java tañu nacatáhan ndó xihín java ga na tá nandoho ri ini na sahá Jesús. ³⁴ Ta táhdá ini ndó sahá na cúu cuénta Jesús ñúhu vecaa. Ta coo nacahan cuachí ndo ta jandá cájii ini ndó vatí nacaja cuíhná na ñaha ndó jáchi cándaa vaha ini ndó ña cómi ndó ña vaha chága indiví ta a ndíhi toho sahá ña cán. ³⁵ Ña cán quea a jándacoo ndó ña cándee ini ndó Jesús jáchi tandaa quivi quiahva cuahá Ndióxi ña vaha nu ndo tá cándee ini ndó mé á. ³⁶ Ndítahan nu ndó

quiahva ndeé ini ndó caja ndó ña cúní Ndióxi já quéa ndiquehe ndó ña vaha nasahan mé á tuhun a quiahva nu ndo. ³⁷ Jáchi já cáchi tuhun Ndióxi já: Jalóho cúní ta já quixi mé a ndítahan nu quixi ta a cáyáncá toho a.

³⁸ Joo ndá na cúu ñayivi ndaa nu mí i catacu na sahá ña cándéé ini na yehe.

Ta tá co cúní ga na cándéé ini na yehe ta já ndicó coo na caja na cuachi já quéa a cáji iní i xihin ná, já cáchi Ndióxi.

³⁹ Joo a caja toho í tá quiahva caja java ñayivi jáchi co cúní na cándéé ga ini na Jesús ta tandaa quivi cuhun na indayá. Joo mí cúu yó na cándéé iní Jesús ta tandaa quivi coo í nu in mé á.

11

Ndítahan nu yó cándéé iní Ndióxi

¹ Tá ná cándéé iní Ndióxi já quéa cúní cachi a ña sa xíní vaha í ña yaha tá yaha ña ndátí yó yaha. Ta vatí co xíní yó ña ndátí joo cándéé iní ña já coo.

² Jáchi sahá ña nacandéé ini tásáhnú jícó yo Ndióxi sanahá ndivaha sahá ña cán quéa cáji iní Ndióxi xihin ná.

³ Ta sahá ña cándéé iní Ndióxi sahá ña cán quéa cánda vaha iní ña nacahan Ndióxi ta já nacavaha mé á ñuyívi xihin indiví. Jihna coo nasahin ni in ñaha joo viti náha nu ña nacavaha mé á.

⁴ Ta sahá ña nacandéé ini da naní Abel Ndióxi sahá ña cán quéa natahan ini Ndióxi xihin ña nacaja da tá najocó da ñaha nu á. Ta coo natahan ini a xihin ña najocó da naní Caín, da cúu ñani Abel jáchi coo nacandéé ini Caín mé á. Sahá ña cán quéa

nandiquehe Ndióxi ña najoco Abel nu á ta xihín ña yóho nanduu da da ndaa nu á. Ta vatí naxihí Abel joo xihín ña nacija da sanahá jánaha da nu yo ndaja ndítahan nu yó candeé ini Ndióxi.

⁵ Ta sahá ña nacandeé ini da naní Enoc Ndióxi sahá ña cán quéa coó naxihí toho da. Joo nasañehe Ndióxi da indiví ta coó nacuu ndiñehé ñayivi mé dá jáchi nandaa da cuahan da indiví nacija Ndióxi. Ta cáchi tuhun Ndióxi já nacija mé á jáchi táhán ini a xihín ña nacija Enoc nani nasahjin da ñuyívi yóho. ⁶ Tá co candeé ini Ndióxi já quéa co táhán ini Ndióxi xoho. Jáchi ndá na cuni cayati nu Ndióxi xini ñúhú cándúsa na ña ín mé á indiví ta xini ñúhú cándúsa na ña quiahva mé á ña vaha nuú ñayivi tá ndinducú na mé á.

⁷ Ta sahá ña nacandeé ini da naní Noé Ndióxi sahá ña cán quéa nataa johó da tá naxaxi tuhun Ndióxi xihin dá ña ndoho ini ñayivi chága chí nuu vatí coó nasannahá nu á. Nacandúsa Noé Ndióxi ta chí nacasáhá da cávaha da in barco cáhnu nuú cuu cacu ndaa mé dá xihín na vehe da. Ta sahá ña nacandeé ini da Ndióxi sahá ña cán quéa nanduu da taa ndaa nu mé á. Ta xihín ña nacija da najácojo da cuachi jatá ñayivi ñuyívi jáchi náha cáxi a ña coó nacandúsa na caja na ña cáchi Ndióxi.

⁸ Ta sahá ña nacandeé ini da naní Abraham Ndióxi sahá ña cán quéa nacandúsa da ña nacañan Ndióxi xihin dá. Ta chí naquee da ñuu da ta cuahan da in ñundáhyi, ña nasahan Ndióxi tuhun a quiahva nu dá. Najándacoo da ñuu da vatí coó nasaxini da ndaja naní mé ñuu nuú cuhun da. ⁹ Ta sahá ña candeé ini Abraham Ndióxi sahá ña cán quéa naxinu coo da ñundáhyi ña nasahan Ndióxi

tuhun a quiahva nu dá. Joo nandiñehe dá java ñayivi ndúu cán chí ñasahiin da tá quiahva ndúu ña tóho. Vehe tienda ñasahiin da xihín ña vehe da. Ta quiahva já ñasahiin Isaac xihín Jacob jáchi ñasahan Ndióxi tuhun a nu mé dá xihín nuú ña vehe da. ¹⁰ Ñacaja Abraham ña yóho jáchi ndáti da coo da in ñuu ña ín indiví, ña ñacavaha Ndióxi nuú coo a anda ama cáa quivi.

¹¹ Ta jári ñacandee ini Sara, mé ñájíhí Abraham Ndióxi sahá ña cán quée ñacaja Ndióxi ña ñacuu quee jahyi ña vatí sa ñacayatá ña. Ta tá nandihi já ñacacu jahyi ña ta ñasacuu a sahá ña ñacandee ini ña jáxinu coo Ndióxi tuhun ñasahan nu ña. ¹² Sahá ña cán quée vatí ñacayatá ndivaha Abraham ta ñacayati quivi quivi da joo ñacacu jahyi da xihin ña ta ñandu da tásáhnú jícó ña Israel. Ta cuhá ndivaha na cúu chichi da janda a cuú candahvi na. Cúu á tátuhun quimi ña ín indiví á tátuhun ñuti yuhú tañuhú jáchi a cuú candahvi a.

¹³ Tóco ndihi ña ñaquixi chichi Abraham yóho vatí ñaxihí ña joo ñacandee tá ñacandee ini na Ndióxi. Ta vatí coo ñaxini na ña ñasahan mé á tuhun a quiahva nu ná joo ñasacuu a tátuhun ñaxini na ña. Jáchi ñacandee ini na ña ñacachi Ndióxi xihin ná ta ñacajii íní ña. Ña cán quée ñacachi na ña ndúu tóo cuití ña ñuyíví yóho ta cúu ná tátuhun ña tóho jáchi coo ñuu na ñuyíví yóho. ¹⁴ Cándaa íní ña ndá ña cáhí já cúni cachi a ña ndinducú ña inga ñuu nuú canduu na. ¹⁵ Ta coo ñatahnda ini na sahá ñuu ñaquee na cán jáchi cuu ndicó coo na, nduu joo coo ñacacúni na caja na ña. ¹⁶ Joo ña ndúcú ña cúu in ñuu ña vaha chága, ña ín indiví. Ta ñacaja tiahva Ndióxi mé ñuu indiví nuú

cuu coo na já quéa a cácahan nuu mé á cachi a ña cúu ná cuénta mé á.

¹⁷ Ta sahá ña ñacandeeé ini Abraham Ndióxi sahá ña cán quéa ñasahin tiahva da cahní da Isaac, jahyi da joco ñahá da nu Ndióxi tá naxito ndojó Ndióxi da. Já ñacaja Abraham vatí ñasahin in tuhún jiní jahyi da ta sa ñasahan Ndióxi tuhun a nu Abraham ¹⁸ tá ñacachi a já xihin dá: “Cacu jahyún, da cananí Isaac ta xihín da cán ndicuahá ndivaha chichún chága chí nuu”, ñacachi Ndióxi.

¹⁹ Sa ñacandaa vaha ini Abraham ña cuu caja Ndióxi ña ná nditacu tucu Isaac tá sa naxihi da. Ta vatí coó ñasahní toho Abraham Isaac joo cúu á tátuhun naxihi da ta ñanditacu tucu da jáchi ñasahin tiahva da cahní da da sahá ña ñacandeeé ini da Ndióxi.

²⁰ Ta sahá ña ñacandeeé ini Isaac Ndióxi sahá ña cán quéa ñasahan da tuhun da nu ndíví jahyi da, da naní Jacob xihín da naní Esaú ña caja cuaha Ndióxi ñamaní xihin ndíví da chága chí nuu. ²¹ Ta sahá ña ñacandeeé ini Jacob Ndióxi sahá ña cán quéa tá jalóho cúni quivi da já quéa ñacachi da ña caja cuaha Ndióxi ñamaní xihín iví jahyi ñání da, da cúu jahyi da naní José. Anda jáví ñacaja cáhnu da Ndióxi nani tীন ndaa da garrote da. ²² Ta sahá ña ñacandeeé ini José Ndióxi sahá ña cán quéa tá jalóho cúni quivi da ñacahan da xihin na Israel sahá mé quivi tá ná quee na nación Egipto cuhun na. Ta ñasahnda da chuun nu ná ña ná cañehe na lasa yiquí cuñu mé dá cuhun ña xihin ná.

²³ Ta sahá ña ñacandeeé ini náná tátá Moisés Ndióxi sahá ña cán quéa tá ñandihí ñacacu da já ñachicaan jehé na da tañu uní yoo. Náha ña

cúu dá in léē ñúchí ndivaha ta chí coó nayihví toho na tuhun naçahan rey cán tá naçahnda da chuun ña quivi ndihi tavalí jacá naçacu nuú na Israel. ²⁴ Ta sahá ña naçandeeé ini Moisés Ndióxi sahá ña cán quea tá naçahnu da najándacoo da vehe rey Egipto vatí najácuahnu ña cúu jahyi jíhí rey cán da tátuhun jahyi ña. ²⁵ Ta ña naçaja da quea naçahan da nandoho ini da xihín na cúu cuéntá Ndióxi. Jáchí co cúni da cáji ini da cája da cuachi vatí chá tiempo. ²⁶ Ta naçahán da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchí naçahvi ini da sahá ñamaní caja Ndióxi xihín da chága chí nuu. ²⁷ Ta sahá ña naçandeeé ini Moisés Ndióxi sahá ña cán quea najándacoo da nación Egipto ta coó nayihví da ña ná ndicuehe rey Egipto cán xihín dá. Ta naçahan ndeeé ini da jáchí naçica da tátuhun in da xíca xihín Ndióxi vatí coó naçini da mé á.

²⁸ Ta sahá ña naçandeeé ini Moisés Ndióxi sahá ña cán quea naçahnda da chuun ña ná caja na Israel vicó pascua. Naçahnda da chuun ña ná cahní na ndicachi ta já cuihna ndaa na nií rí yuyéhé vehe na Israel ña ná a quiví jahyi taa na, da naçacu nu cuítí tá ná yaha táto Ndióxi, mé a cája ña ná quivi ñayivi. ²⁹ Ta sahá ña naçandeeé ini na Israel Ndióxi sahá ña cán quea nayaha na mahñú ndaa tañuhú naní tañuhú cuahá. Naçacuu a tátuhun xíca na nu ñundáhyi íchí uun. Joo tá naçasáhá na Egipto yáha na mé tañuhú cán já quea coó naçuu caja na ña. Naçandaa na ini ticuií ta já naçihí ndihi na.

³⁰ Ta sahá ña naçandeeé ini na Israel Ndióxi sahá

ñã cán quẽã ñacava nuu na ñuu Jericó tañu ùsã quivĩ ta já ñacuyu ndihi náma ñuu cán. ³¹ Ta sahã ñã ñacandẽẽ ini ñã xĩca jji naní Rahab cán Ndióxi sahã ñã cán quẽã coó ñaxihĩ ñã xihín ndihi ñayivi ñuu Jericó, ñã coó ñacandúsa Ndióxi. Najácacu Ndióxi Rahab cán jáchi sa ñandiquehe vaha ñã java tãa Israel tá ñacasãã ñã nu cuítĩ sãndehé ñã ñuu cán.

³² Ndã chãga cãhan i xihín ndo. Sã ñacãhan cuahã i xihín ndo joo cámanĩ cãhan i sahã ñã naní Gedeón xihín ñã naní Barac xihín ñã naní Sansón xihín ñã naní Jefe xihín ñã naní David xihín ñã naní Samuel xihín java gã ñã ñasacuu profeta.

³³ Sahã ñã ñacandẽẽ ini ñã cán Ndióxi sahã ñã cán quẽã ñaqueẽ vaha na tá ñacani táhan na xihín java nación ta ñasacomí vaha na cuéntã sahã ñayivi ta ñandiquehe na ñã vaha ñasãhan Ndióxi tuhun a quiahva nu ná. Java na ñachicaji na yúhu león.

³⁴ Ta java na ñandahva na ñúhu cáyi ñã ná a cáyi toho na. Ta java na ñacacu na ndahã ñayivi, ñã ñacacúni cahnĩ ñahã xihín machiti. Ta java na vatĩ vitã ini na joo ñandihvi ndéẽ ná. Ta java na ñaqueẽ vaha na tá ñacani táhan na xihín ñã ihvi ñã. ³⁵ Ta java ñajihĩ ñacandẽẽ ini na Ndióxi ta sahã ñã cán quẽã ñaxini na ñã ñanditacu tucu ñã vehe na ñacaja Ndióxi.

Joo java na ñandoho ndivaha ini na jãnda quiahva ñaxihĩ ñã. Ta coó ñacandúsa na cacu xoo na Ndióxi jáchi ñacandãã vaha ini na ñã cuhun ñã coo na in ñuu vaha chãga nu ín mé á. ³⁶ Java na ñandoho ini na tá ñasacu ndaa ichĩ ñahã ñã ta ñacani ñahã ñã. Ta java na ñasandico ñã xihín cadena ta ñachicãan ñã ñã vecãã. ³⁷ Ta java na

naxihí na jáchi naçuun ñayivi yuu ná ta java na naxihí na tá ñasahnda túhun ñahá na. Ta java na ñaxito ndojó ñayivi na ña ná caja na cuachi. Ta java na naxihí xihin machiti. Ta java na ñasandíxi na xihin níí ndicachi xihin níí tijúhu cuití va jáchi coó toho jiuhún na. Nacaja xíxi ñayivi xihin ná ta najándoho na ini na. ³⁸ Naxica ndáhví na nu íchí ndivaha ta naxica nuu na yucú ñúhú ta ñasanduu na tixi cáva xihin yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyiví yóho. ³⁹ Ta cájii ini Ndióxi xihin tóco ndihi na cán jáchi ñacandeeé ini na mé á. Joo cámani ndiquehe na ña ñasahan mé á tuhun a quiahva nu ná. ⁴⁰ Jáchi cúni Ndióxi ña ná candati na cán anda tandaa quiví ndiquehe tóco ndihí ña vaha chága quiahva Ndióxi nu yo.

12

Ná candeeé ini Jesús cuití va

¹ Mé ñayivi cuaha cán ñaquee vaha na jáchi ñacandeeé ini na Ndióxi. Ta jánaha na nu yo ndaja caja í ña ná quiahva ndeeé ini tá ná ndoho ini. Ña cán quea ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó íchi Ndióxi xihin ndinuhu ini tá quiahva ndítahan caja í. ² Ta ná candehé cáxi yo nuu Jesús jáchi mé á cán cája ña ná casahá candeeé ini Ndióxi ta cája ña ná candeeé ini mé á anda tandaa quiví quiví. Nandoho ini Jesús tá naxihí a ndica crúxu ta coó ñacacahan nuu á vatí cácahan nuu ñayivi quivi na quiahva já. Jáchi ñacandaa ini a ña tá ná ndihi ndoho ini a já

tandaa quiví cají ndivaha ini a. Ta viti ín coo a xoo cuáha Ndióxi indiví.

³ Xíní ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán queá a jándacoo ndó ña cándéé ini ndó Jesús ta a cácuitá ínima ndó tá ndóho ini ndó. ⁴ Jáchi cámaní yí va cahní na cája cuachi ndohó sahá ña co xeén ndó caja ndó cuachi. ⁵ Á nandindójó ndó tuhun nacahan Ndióxi xihín ndo sahá ña cúu ndó jahyi mé á. Já cáchí tuhun Ndióxi já:

Jahyi maní i, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva iví joho ini ndó tá jánani mé á ndohó.

⁶ Jáchi já cája Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáchí tuhun Ndióxi.

⁷ Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da.

⁸ Ta tá co jándoho Ndióxi ini ndó já queá co cúu ndó jahyi mé á. Cúu ndó tátuhun jahyi ndáhví na. Joo tá ná jándoho Ndióxi ini ndó já cándaá ini ndó ña mé a ndaa cúu ndó jahyi mé á. ⁹ Tá nasacuú na valí nacaja cáhnu yó tátá yo vatí najácaxáhan na mí. Joo ín chága saha caja cáhnu í Ndióxi, tátá yo, mé á ín indiví vatí jándoho a ini mí jáchi xihín ña yóho cuu coo í xihín mé á anda ama cáa quiví. ¹⁰ Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyíví yóho cúu á nu nduu too cuití ví. Joo tá jánani Ndióxi, tátá yo, mí cúu á

ñā vaha chága jáchi xihín ñā yóho ndaja yī á mí tá quiahva ín yī mé á. ¹¹ Mé a ndaa co táhán iní tá jánani na mí jáchi cáhivī yo xihín á. Joo tá nandihī já coo vaha iní jáchi načatiahva í ndaja caca vaha í sahá ñā nandoho iní ta xihín ñā yóho cacuú ñayivi ndaa nu mé á.

Ndítahan nu yó táa johó í nu cáhan Ndióxi

¹² Ñā cán quēa ndicuita ndó ta a jándacoo ndó mé ndó. ¹³ Ta ndinducú ndó ichi ndacú já ná cuu chindeé ndó ñayivi, na cáva ivi johó ini ñā ná a ndícó coo na nuú cuachi.

¹⁴ Xíní ñúhú ndinducú ndó ndaja caja ndó coo vaha ini ndó xihín tóco ndihī ñayivi. Jándacoo ndó cuachi cája ndó ta ndinuhu ini ndó caja ndó ñā cúni Ndióxi já ná cuu coo ndó nu ín mé á. ¹⁵ Cuéntá coo ndó ná a jándacoo ni in ndó ichi cuéntá Ndióxi jáchi cúni a caja cuahá ñamani xihín ndo. Cuéntá coo ndó ná a cácuu ndó tátuhun in yucu ova ñā jativí ñā xixi na jáchi na cája cuachi cája quini na ta jativí na java ga na cúu cuéntá Ndióxi. ¹⁶ Coto a quíhvi nuu ndó coo ndó xihín in na coo cúu yí ndo á ñájíhí ndo. Coto a quéhe núu ndó ñaha Ndióxi tá quiahva načaja Esaú. Jáchi in quivī cuíco ndivaha da ta najicó da tóco ndihī ñaha ndítahan ndiquehe da nu tátá da sahá ñā ná cuxu da in coho cuití va. ¹⁷ Joo cándaā iní ñā tá nandindaa nuu dá ndiquehe da ñaha ndáha tátá da coo načuu ndiquehe da ni in ñaha. Jáchi najicó da ñā nuú ñani da sahá ñā ná cuxu da in coho. Ta vatí nasacu ndivaha da joo coo načuu caja da ndijama da tuhun da ñā sa nasahan da nuú ñani da.

18 Ta mé ndó coó ñacayati ndó nu Ndióxi tá quiahva ñacaja na Israel sanahá. Mé na cán ñataca na saha in yucu naní Sinaí xihín da naní Moisés. Ta ñacayi ñúhu cán ta ñanaá ndivaha ta ñaxicó ndivaha tachí ñaxini na. 19 Ta ñaxini joho na ñativi trompeta ta ñacahan Ndióxi xihín ná. A juú quiahva ñayihví na tá ñaxini joho na nu cáhan Ndióxi chí ñaxica tahví na nu á ña ná a cáhan ga xihín ná. 20 Jáchi coó ñacandeé ini na táa joho na ña sáhdá Ndióxi nu ná tá ñacachi a já: “Tá ná cani ndaa in ñayivi á in quítí yucu Sinaí yóho já queá xíní ñúhú cuun ndó yuu ná á tuxú ndó na xihín póyá anda ná quivi na”, cáchi Ndióxi. 21 Ta a juú quiahva ñayihví na sahá ña ñaxini na cán. Ta anda Moisés viti ñayihví ndivaha da ta já ñacachi da já: “Quíji ñinu i xihín ña yíhví i”, cáchi da.

22 Joo ña ñacaja mé ndó queá sa ñacayati ndó in nuú naní Sión, mé nu ín Ndióxi, mé a tácu indiví. Mé ñuu cán cúu á tátuhun inga Jerusalén, ña ín indiví ta ndúu cuaha mil tátó Ndióxi cán. 23 Sa ñataca ndó cán caha cáhnu ndó Ndióxi xihín tóco ndihi ñayivi, na mé a ndaa cúu jahyi Ndióxi, mé na ndaa quivi nu libro Ndióxi indiví. Ta sa ñacasaa ndó nu Ndióxi, mé a cája víi saha tóco ndihi ñayivi. Ta ñataca ndó xihín tóco ndihi ñayivi, na sa ñaxihí sanahá, mé na sa ñanduu ndaa nu Ndióxi ñacaja mé á. 24 Ta sa ñacayati ndó nuú Jesús, mé a cáhan xoo mí nu Ndióxi. Jáchi sahá ña ñacaja Jesús tá ñaxita ñi á ndica crúxu sahá ña cán queá ñasahan Ndióxi tuhun a nu yo ña ná ndoo cuachí. Joo jín va ñacaja Ndióxi tá ñaxita ñi Abel sanahá ndivaha jáchi najándoho a ini ñani da, da naní Caín sahá ña ñasahní ñahá da.

25 Cuéntá coo ndó já ná a quéhe núu ndó nu cáhan Ndióxi xihin yo. Jáchi ñayivi cán, na coó naxeen cája ña cáchi Ndióxi nachahvi na sahá ña núu nacija na mé ñuyívi yóho. Ta já caja ri Ndióxi xihin mí tá ná quehe núu í tuhun mé á jáchi janda indivi íin mé á cahan xoho. 26 Mé tiempo cán najataan Ndióxi ñuyívi yóho tá nacañan mé á. Joo já cáchi a já viti: “Vaxi quiví ta jataan tucu i ñuyívi ta mé tiempo cán jáquiji nuu i indivi viti”, cáchi a. 27 Tá nacachi Ndióxi ña inga tucu jataan mé á ñuyívi yóho já cándaá iní ña ndihi sahá ñaha nacavaña mé á. Ta tóco ndihi ñaha, ña a cuú quiji nuu, ña cán coo a anda ama cáa quivi. 28 Ñehē táhvi yo coo í nuú cacomí Ndióxi cuéntá saha yo ta mé cán a cuú quiji nuu a. Sahá ña cán quéa ná ndiquiahva í ndixahvi nu Ndióxi ta ná caja cáhnu í mé á xihín ndinuhu iní jáchi cájii ini mé á xihín ña yóho. 29 Jáchi mé a ndaa Ndióxi cúu á tátuhun ñúhu ña cáyi ña jándihi sahá ñaha. Ña cán quéa caja mé á ña ná ndihi saha tóco ndihi cuachi.

13

Ná caja í ña táhan ini Ndióxi xihin

1 A jándacoo ndó ña quíhvi ini ndó na cúu cuéntá Jesús jáchi cúu ná tátuhun ñani ndó á quiahva ndó.

2 A ndíndójó ndo ndiquehe vaha ndó na tóho tá ná casaa na vehe ndó jáchi xihín ña yóho java na nandiquehe vaha na tátō Ndióxi vatí coó nacandaá ini na ña.

3 A ndíndójó ndo sahá ñayivi ñúhu vecaa ta xíní ñúhú tahnda ini ndó xihin ná jáchi xíní ñúhú cacuu a tátuhun ndácaan mé ndó vecaa xihin ná. Ta a

ndíndójó ndo sahá ñayivi, na cája xíxi na xihin ta xíní ñúhú tahnda ini ndó xihin ná jáchi cuu ndoho ini ri ndóhó va tá quiahva ndóho ini na cán.

⁴ Vaha va cája ndó tá tándaha ndo ta xíní ñúhú caja cáhnu ndó yíi ndo á ñájíhí ndo. Ta a ndúcú toho ndó coo ndó xihín inga na jáchi jándoho Ndióxi ini ndá na quíhvi nuu coo xihín na coo cúu yíi na á ñájíhí na.

⁵ A ndiáva ini ndó cacomí ndó cuahá jiuhún. Ndítahan caji ini ndó xihín ña cómí ndo jáchi já cáchí Ndióxi já: “A jándacoo toho i ndohó ta ni a ndíndójó i saha ndo”, cáchí a. ⁶ Sahá ña cán quea cuu candeé ini Ndióxi ta cuu cachí já:

Mé á cúu Ndióxi, xitoho i ta chindeé a yehe.

Ta a cáyihvi toho i ndá ñaha ndúcú ñayivi caja na xihín i.

⁷ A ndíndójó ndo sahá na nasacomí cuénta saha ndo ta ni sahá na naçaxi tuhun tuhun Ndióxi nu ndo. Candehé ndó ndaja naçaja na ñuyiví yóho jáchi naçandeé ini na Ndióxi anda quiahva naxihí na. Ta ndítahan nu mé ndó candeé ini ndó a tá quiahva naçaja na cán.

⁸ Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quivi.

⁹ A quiahva toho ndó ñamaní nuú ñayivi ña ná jándahvi na ndohó xihín ña jánaha na nu ndo. Jáchi cúu á sahá ñamaní cája Ndióxi xoho ña ndíndacú ínimá yo. Ta coo cúu á sahá ña jánaha java ñayivi tá cáchí na ña a cúu cuxú java ñaha ña ná nduu ndaa ínimá yo. Mé a ndaa ña yóho coo chindeé a mí.

¹⁰ Tá naxihí Jesucristo ndica crúxu já najoco a mé á nu Ndióxi saha yo. Joo jíin va naçaja jutú

cuéntá nā Israel sanahá tá najoco nā quíti nū Ndióxi. ¹¹ Jáchí da cúu jutū sacuaḥa nasañehe da nīí rí naxihí cán ini veñuhu nuú yīí ndivaḥa ta já najoco da dó nū Ndióxi saḥá cuachi ñayivi. Joo natavá da yiquí cuñu rí jatá ñuu nū sáhmi na rí. ¹² Ta quiahva já naxihí Jesús jatá ñuu Jerusalén. Ta naxita nīí a ña ná jándo a cuachi ñayivi. ¹³ Ña cán queá cóho nuú Jesús. Cúu á tátuhun cuhun í jatá ñuu ta a cáchan nuu yó ndoho iní xihín mé á. ¹⁴ Jáchí ñuyíví yóho cóo toho ni in nuú cuu coo í anda ama cáa quivi. Joo ndínducú yo inga ñuu nuú cuu coo í chága chí nuu. ¹⁵ Cóho caja cáhnu í Ndióxi níí tiempo ta chindeé Jesús mí caja í ña. Ta ña yóho cúu á tátuhun ña jóco yo nū mé á saḥá ña naḥaja tá naxihí a ndica crúxu. Cóho caja cáhnu í mé á xihín yúhu yo jáchí cúu yó cuéntá mé á. ¹⁶ A ndíndójó ndo caja vaḥa ndó ta ná chindeé ndo ñani táhan ndó xihín ña cómí ndo. Jáchí ña yóho cúu á tátuhun ñaha jóco ndo nū Ndióxi ta cájii ini mé á xihín á.

¹⁷ Candúsa ndó nā cómí cuéntá saḥa ndo ta caja ndó ña cúni nā. Jáchí nasaḥan Ndióxi chuun yóho nū ná. Ta tandaa quivi nditahan ndicani na nū Ndióxi saḥá ña naḥaja na. Caja ndó ña cúni nā já ná cájii ini na ta ná a cóo cuéḥa ini na jáchí a cuú quee vaḥa ndó já.

¹⁸ Caça tahví ndo nū Ndióxi saḥá nde jáchí nandivií ínimā nde ta cúni nde caja vaḥa nde níí tiempo. ¹⁹ Caja ndó ñamani caça tahví ndo saḥá i ña ná quiahva Ndióxi ñamani nuú i saḥa yachi i nū ndó coto nihni i ndohó.

Xihín tuhun yóho ndihi carta yóho

²⁰ Ña cúní quéa ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúu xitoho í. Ta sahá ña ñacaja Jesucristo tá naxitá nji a ndica crúxu sahá ña cán quéa nasahan Ndióxi tuhun a nu yó ta a ndíhi toho sahá. Ta mé Jesús cómi a cuéntá saha yó tá quiahva in pastó cómi da cuéntá sahá ndicachi jana dá. ²¹ Ta ná caja Ndióxi ña ná ndindacú ínimá ndó já ná cuu caja ndó tóco ndihi ña cúní a. Ta sahá ña ñacaja Jesucristo ná caja Ndióxi xihin yó ndá ña ñacuu ña táhán ini mé á xihin. Ná caja cáhnu í Jesucristo anda ama cáa quivi. Já ná coo.

²² Xíca tahví i nu ndo ña ná coo cáhnu ini ndó xihin tuhun cáhan i xihin ndo, ñani i, ña cúu cuéntá Jesús. Jáchi carta loho cuití va ñacahyí i nu ndo já ná ndindacú ínimá ndo. ²³ Ta cáxi tuhun i xihin ndo sahá Timoteo, mé da nasandacaan veca joo sa najani dá viti. Tá ná casa yachi da yóho já saa da xihin i coto nihni nde ndohó.

²⁴ Cahán Ndióxi ndó xihin tóco ndihi na janaha tuhun Ndióxi nuú ñayivi ta cahán Ndióxi ndó xihin tóco ndihi na cúu cuéntá Jesús. Tóco ndihi na cúu cuéntá Jesús, na ndúu nación Italia yóho chindahá na Ndióxi coo ndó.

²⁵ Ná caja cuaha Ndióxi ñamani xihin tóco ndihi ndó. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f